

REGLUGERÐ

um stuðning Framleiðnisjóðs landbúnaðarins við nýjar búgreinar, búháttabreytingar og aðra nýbreytni í landbúnaði.

1. gr.

Merking orða er í reglugerð þessari sem hér segir:

Búmark er viðmiðunartala afurðaeininga hjá einstökum framleiðanda búvöru, sem ákveðin er skv. reglum, settum með heimild í lögum nr. 46 27. júní 1985.

Áunnið búmark er viðmiðunartala afurðaeininga hjá einstökum framleiðanda búvöru eftir meðalframleiðslu hans árin 1976-1978, skv. skattframtali þau ár.

Ærgildi er bústofnseining. Vetrarfóðruð sauðkind telst 1 ærgildi, kýr telur 20 ærgildi, kelfd kvíga 12, vetrungur 8 og kálfur 4 ærgildi.

Ærgildisafurð er afurðaeining. Ein ærgildisafurð telst vera 16,8 kg af dilkakjöti og tilsvarendi verðmæti í kjöti af fullorðnu fé, eða 174 lítrar af mjólk, eða 20 kg af nautakjöti.

Lögbýli er skilgreint með sama hætti og í 1. gr. ábúðarlaga nr. 64 31. maí 1976 með síðari breytingum.

Verðlagsár er tímabilið frá 1. september til 31. ágúst árið eftir.

2. gr.

Framleiðnisjóður landbúnaðarins ráðstafar eftirgreindu fé til viðfangsefna í landbúnaði:

- a) fé sem ríkissjóður leggur fram til þess að mæta áhrifum samdráttar í framleiðslu mjólkur og sauðfjárafurða, sbr. 37. gr. 1. nr. 46 27. júní 1985,
- b) tekjum af hinu sérstaka fóðurgjaldi, sbr. 2. mgr. 34. gr. 1. nr. 46 27. júní 1985.

3. gr.

Fé skv. a-lið 2. gr. er stjórn Framleiðnisjóðs heimilt að ráðstafa sem framlögum til þeirra er breyta um búskaparhætti á lögbýlum á árunum 1985-1990. Um eftirfarandi framlög er að ræða:

- a. til þeirra sem fella niður eða draga úr framleiðslu mjólkur og/eða sauðfjárafurða til sölu á almennum markaði,
- b. til þeirra sem fella niður eða draga úr framleiðslu mjólkur og/eða sauðfjárafurða til sölu á almennum markaði um tiltekinn tíma,
- c. til greiðslu afurða, sem falla til við bústofnsbreytingar vegna samdráttar í búrekstri og eru umfram búmark viðkomandi framleiðanda, eða þann hluta þess, sem hann á rétt á grundvallarverði afurðanna fyrir, sé sá hluti ákveðinn lægri en búmark framleiðanda er,
- d. til þeirra sem taka upp á lögbýlum annan atvinnurekstur en mjólkurframleiðslu og kjötframleiðslu.

Fyrir framlögum skv. d-lið skulu þeir að öðru jöfnu sitja, sem breyta búvöruframleiðslu sinni skv. a-lið þessarar greinar, eru frumbýlingar, eða hafa lægra búmark en svarar til verðlagsgrundvallarbús sem um er samið skv. 8. gr. 1. nr. 46 27. júní 1985.

Framlög skv. a- og b-lið þessarar greinar skulu vera tilteknar upphæðir á hvert ærgildi búmarks, sem viðkomandi framleiðandi afsalar sér.

Með umsókn um framlag skv. d-lið þessarar greinar skal umsækjandi leggja fram stofn- og rekstraráætlun um fyrirhugaðan atvinnurekstur á býlinu. Áætlanir skulu staðfestar af héraðsráðunaut, eða öðrum þeim aðila, sem stjórn Framleiðnisjóðs telur til þess hæfan.

Að fengnum tillögum Framleiðnisjóðs ákveður landbúnaðarráðherra fyrir 1. janúar ár hvert, hver upphæð framlags í hverjum flokki skv. 1. mgr. þessarar greinar skuli vera næsta almanaksár.

4. gr.

Stjórn Framleiðnisjóðs er heimilt að binda framlag vegna búháttabreytinga með kaupum eða leigu á búmarki við 50 ærgildi að lágmarki og 500 ærgildi að hámarki hjá einstökum framleiðanda. Framlag fyrir búmark sem framleiðandi hefur haft, en ekki nýtt með framleiðslu næstliðin fimm verðlagsár, skal ákveðið lægra en framlag á búmark sem nýtt hefur verið á þeim tíma.

Framleiðnisjóður ásamt Framleiðsluráði landbúnaðarins gera, að fenginni heimild landbúnaðarráðherra, samninga við bændur um búháttabreytingar skv. reglugerð þessari. Framleiðnisjóði er heimilt að fela Framleiðsluráði landbúnaðarins eða öðrum aðila frágang samninga þessara og eftirlit með þeim fyrir hönd sjóðsins.

5. gr.

Framleiðnisjóði er heimilt að skipta greiðslum skv. 3. gr. á tveggja ára tímabili frá undirritun samnings um búháttabreytingu sbr. 4. gr.

Leiga fyrir ónotað búmark skv. b-lið 3. gr. skal greidd árlega. Leigutími skal vera a. m. k. fimm ár. Óski viðkomandi framleiðandi að nýta búmarksheimild sína að liðnum fimm árum frá gerð leigusamnings, ber honum að tilkynna Framleiðsluráði það, eigi síðar en tólf mánuðum áður en hann hyggst leggja fyrstu mjólk sína og/eða sauðfjárafurðir inn í afurðastöð og lækkar leiga tilsvareandi við það sem notað er af búmarkinu. Hafi samningur um leigu búmarks staðið óbreyttur í tíu ár, fellur búmarksheimild viðkomandi niður án bóta.

Hefji viðkomandi framleiðslu mjólkur- eða sauðfjárafurða án þess að tilkynna um hana í samræmi við ákvæði þessarar greinar, skal með hana fara sem aðrar afurðir umfram búmark.

6. gr.

Samningi um sölu eða leigu á búmarki skal þinglýst sem kvöð á viðkomandi jörð.

7. gr.

Óski ábúandi á jörð, sem afsalað hefur búmarki með samningi skv. a-lið 3. gr., eftir að fá búmark að nýju til að hefja framleiðslu mjólkur og/eða sauðfjárafurða, skal með það fara eins og um nýjan framleiðanda þessara afurða væri að ræða. Hið sama gildir, hafi búmarksheimild fallið niður, sbr. 2. mgr. 5. gr. þessarar reglugerðar.

8. gr.

Staðfesting á búmarki og um breytingar á því skal fara eftir búmarksskrá, sem haldin er í samræmi við VII. kafla l. nr. 46 27. júní 1985.

9. gr.

Um ráðstöfun annars fjár Framleiðnisjóðs en hér hefur verið talið sbr. 2. gr., gerir stjórn sjóðsins tillögur til landbúnaðarráðherra. Skal því varið til eflingar nýrra viðfangsefna í landbúnaði, stuðnings við búgreinar, markaðsöflunar og til fjárhagslegrar endurskipulagningar búreksturs á lögbýlum. Fyrirgreiðslu má veita í formi framlaga og lána.

10. gr.

Framleiðnisjóður birtir reikninga sjóðsins árlega í Stjórnartíðindum. Þar skal tekjum af hinu sérstaka fóðurgjaldi, sbr. b-lið 2. gr., og ráðstöfun þeirra haldið sérgreindum. Skal ríkisendurskoðun endurskoða þann hluta reikninga sjóðsins, auk lögboðinna endurskoðenda hans.

11. gr.

Brot á ákvæðum reglugerðar þessarar varða refsingu skv. 59. gr. laga nr. 46 27. júní 1985.

12. gr.

Reglugerð þessi, sem sett er samkvæmt heimild í lögum nr. 46 27. júní 1985 um framleiðslu, verðlagningu og sölu á búvörum, öðlast gildi þegar í stað.

Landbúnaðarráðuneytið, 11. október 1985.

Jón Helgason.

Guðmundur Sigþórsson.

AUGLÝSING**um umferð í Vestmannaeyjum.**

Samkvæmt heimild í 2. mgr. 65. gr. umferðarlaga nr. 40, frá 23. apríl 1968 og að fengnum tillögum bæjarstjórnar Vestmannaeyja, eru hér með settar eftirfarandi reglur um umferð í Vestmannaeyjum:

Á sunnanverðri Vestmannabraut frá Skólavegi að Kirkjuvegi er óheimilt að leggja ökutækjum lengur en 30 mínútur á tímabilinu frá kl. 09.00 til kl. 19.00.

Umferð á Bessastígi vikur fyrir umferð á aðliggjandi götum. Á gatnamótum þar sem Bessastígur liggur að: Vallargötu, Boðaslóð, Hólagötu og Brimhólabraut skal setja upp biðskyldumerkið A-6 í samræmi við frammagreinda ákvörðun.

Við umferðareyju á Básaskersbryggju norðan við Skildingaveg er vinstri beygja bönnuð af syðri akrein.

Lögreglustjórinn í Vestmannaeyjum, 3. október 1985.

Jón Ragnar Þorsteinsson, settur.

REGLUGERÐ**um afnám banns við togveiðum á Hornbanka.**

1. gr.

Frá og með 14. október 1985 er felld úr gildi reglugerð nr. 215 31. maí 1985, um bann við togveiðum á Hornbanka.

2. gr.

Reglugerð þessi er sett samkvæmt ákvæðum laga nr. 81 31. maí 1976, um veiðar í fiskveiðilandhelgi Íslands til þess að öðlast þegar gildi og birtist til eftirbreytni öllum þeim, sem hlut eiga að máli.

Sjávarútvegsráðuneytið, 11. október 1985.

F. h. r.

Árni Kolbeinsson.

Jón B. Jónasson.